

四庫全書

史部

# 欽定四庫全書

史部

行水金鑑卷三十一

詳校官監察御史臣王爾烈

刑部郎中<sub>臣</sub>許兆椿覆勘

總校官知縣臣繆琪

校對官編修臣沈清藻

謄錄監生臣于時和

欽定四庫全書

行水金鑑卷三十一

江南按察使傅澤洪撰

河水

萬歷八年總河潘季馴覆議善後疏題為河工告成  
敷陳善後事宜以圖永利事該工科右給事中尹瑾  
條陳具題工部覆奉欽依備咨到臣準此除將款開  
定法制專責成二事應欽遵者通行濱河有司掌印

管河官著實舉行外其重久任甃石堰等五事應議  
覆者已行司道會議詳報前來逐一虛心計處覆議  
相同堪為永利似應依擬合照款列具陳謹題請旨  
一重久任以便責成先該給事中尹瑾題該工部覆  
議河道關係最重類非可以穿鑿於聰明勾幹於倉  
卒者全在得人任久乃可責成及要大小官員俱令  
久任或考滿加陞或積勞超叙與夫就近遞補交代  
親承最為治河先務合咨吏部查照隆慶六年題奉

明旨都著久任事理凡管河部屬司道及府州縣佐貳等官果有熟諳機宜懋著積效者考滿即與陞級照舊管事資深即與超遷用勸異勞有缺就近遴補取其濡染習熟臨行新舊交代令其傳告精詳至於待異等者一如待邊臣由道而撫由撫而督由督而本兵不恠焉合咨臣等年終薦舉預儲可代之才遇缺揭咨必求因才而代徑咨吏部仍知會本部以憑會同遵行其有才志庸劣及不候交代輒先離任者

聽其不時奏劾更易究懲毋或拘攣貽誤大計等因  
行據司道等官議報前來該臣等覆議為照治河固  
難知河不易部科首以久任交代為言誠為永賴至  
計除薦舉賢能汰黜不肖容臣等欽遵著實奉行外  
所據新舊交代一節管河大小官員地方有難易職  
掌有緩急再須分別明白庶免臨時掣肘如中南北  
三管河郎中夏鎮南旺二主事皆係專職俱應交代  
無容別議外至如徐州海防潁州天津霸州大名臨

清七兵備則有兼管河道之責山東河南二副使則有專管河道之責但潁州臨清天津霸州大名五道或距河稍遠或閘渠晏然雖兼河道干係頗輕似應俱免交代其徐州海防二道則為河湖喫緊之區山東河南二道則為黃河要害之地四道憲職并其所轄府州縣佐貳管河官如遇陞調去任等項與同各管河分司俱應比照巡撫衙門事例守候交代仍須咨行吏部知會凡遇各官陞調去任即便就近推補

勒限赴任使舊者得免久候之苦文憑期限明開交代之日方行計算使舊者得免違限之愆如不候代輒先離任者容總理河漕衙門查照工部題準事例指名叅奏伏望敕下該部再加查議擬議上請行臣等遵奉施行則人情既便政體畫一而河務聿興矣

一甃石堰以固要衝

入運河

一濬閘河以利運艘

入運

河一防徐北以固上流先該給事中尹瑾題該工部覆議得全河之勢下流安則徐以南無淺阻之患上



流順則徐以北無改徙之虞今南河可以無慮獨徐  
北未可忘備合咨臣等除行縷二隄遵照原題興工  
幫築外其徐北豐沛碭山一帶宜大修隄工以防上  
流決徙邵家等壩宜併力原築以斷秦溝舊路及縷  
隄有水埽根去處俱要幫築守隄夫役每里補足十  
名工食或於山東河南停役銀內解募或攤派廬鳳  
揚三府或將洪夫仍舊徭徵而以徐州船稅召募夫  
役議擬上請至於量地建鋪安插各夫召民居集免

派隄租人自為守允稱長便等因行據司道等官議  
報前來該臣等覆議照得徐北黃河乃運道上源關  
係尤重今河出小浮橋固能刷洪以深河而徐南一  
帶決塞隄成水無旁溢河身益深掣水愈駛矣但徐  
北新衝崔家口上下尚非故道萬一北決則上而閘  
河不免泛濫之患下而徐邳一帶不免淺涸之虞臣  
等是以有來流艱阻乞恩查議之請也今該科議將  
徐北隄壩加意修築并議增夫防守誠為慎重上源

至計查得徐北行縷二隄先該臣會同各撫按題準  
大修已督各官夫見在幫築此外如華山戚山一帶  
原衝沛縣故道俱倍幫高厚足恃無恐先年碭山隄  
根水掃成河近俱另築月隄以為保障而又於碭單  
接界之所刵築順水斜壩長一千餘丈以截流護隄  
捍外衛內見今伏水止是漫至壩根即順壩歸河不  
復浸及縷隄至於豐縣邵家大壩乃遏絕秦溝舊口  
最為喫緊今將正壩一百四十餘丈幫厚八丈高一

丈一二尺不等又於壩東添築二百餘丈壩西幫築  
九百餘丈以防其旁衝而上流蘇許二壩亦俱次第  
加幫秦溝之患似可杜絕但自碭山以至茶城共隄  
一百五十五里有奇而修守夫役共止七百二十名  
委不敷用合無量照徐南事例每里派夫八名共該  
夫一千二百四十名除已有七百二十名外仍該添  
夫五百二十名每名工食銀七兩二錢共該銀三千  
七百四十四兩查得廬鳳揚三府近年除邳隄夫已

派協濟似難再加又蕭縣因萬歷五年黃河衝漫災傷特甚原編洪淺等夫暫議停編四百餘名今閭閻生氣初回尚難議復合候三二年之後民稍殷阜另議編徵前項增夫工食合於後開議請積貯銀內每歲按季支給其畫地建鋪一節亦應比照徐南每三里建鋪一座以便各夫棲止仍通行各州縣示諭附近居民及復業之人聽其結廬隄上俾人自為守不許輒派隄租以阻受廛之念但嚴禁牲畜作踐務期

保護隄工庶沿隄皆夫上源可固而北徙之患自除  
矣 一備積貯以裕經費先該給事中尹瑾題該工  
部覆議得河道起自豐沛至於淮揚延袤千有餘里  
以葺修則工料浩費以防守則用度鉅艱乃徒恃歲  
額不滿數百之銀而支持千里之河道坐視大壞極  
敝而後請發內帑似為失計見今估修徐北隄工及  
包砌高堰石隄所費不貲原剩錢糧四十四萬有奇  
即使盡留尚未足用宜多方措處約每歲三萬兩積

貯淮安以便支費合咨臣等從長酌議或應再行奏請或徑自措處等因行據司道等官議報前來該臣等覆議照得防河之法全在固守隄岸而隄岸止是土築原非鎔鐵而成者河流之汕刷雨水之淋漓人畜之踐踏能保其不損乎歲修之工必不可缺則工料之費必不可少故積貯實治河第一義也今自徐屬以至揚州一千三百餘里而取給於歲徵災逋數百之銀是所謂無米而炊空拳而搏雖有智者其何

能濟每歲一遇水患袖手張目坐視其敝蓋由此也  
近者大工肇興仰荷皇上俯從改折之議在公帑無  
虧額之虞在閭閻無加派之苦以不費之惠成最繁  
之工實皆廟筭主持之力也然事莫難於守成患恒  
弭於有備故臣等於告成之後惓惓以乞留大工餘  
剩銀料以備每歲修防支費蓋誠慮及於此也今徐  
北大修行縷二隄已估用五萬一千有奇加以議甃  
高堰石隄必將大工餘銀盡數支銷亦未足用然則



預為後日修防之備者容可緩乎但臣等反覆思維  
若欲派之濱河四郡之疲民則積災子遺力有不堪  
若欲派之各省四百萬之漕糧則所在加賦勢又不  
可欲再以餘鹽贓罰為請則已經工部咨議未蒙戶  
部準留似難再瀆查得萬歷五年該戶部題覆淮揚  
撫按會題為仰體皇仁亟處荒蕪要區開地利以厚  
民生事內稱往年凡遇挑河等役每引帶徵鹽銀以  
濟工用議將淮南北共九十萬引每引許商人帶鹽

六斤赴掣每斤徵銀五釐并隨餘鹽銀兩上納另項  
貯庫計每歲帶徵銀二萬七千兩以濟墾田之費原  
議至萬歷八年住支查得前項帶徵銀兩往歲原供  
挑河之用不係解部濟邊之數委應徵解河工備用  
隨該臣等會同巡鹽御史姜璧面議得行鹽地方有  
限若仍照原議墾田之費每歲徵銀二萬七千兩或  
有未便合無行令兩淮運司自萬歷九年為始每引  
止帶鹽四斤每斤徵銀五釐計每歲止帶徵銀一萬

八千兩解淮安府貯庫聽兩河歲修之用俟積貯稍裕又行停徵數年若支用將匱仍舊徵貯夫銀以挑河為名今自儀真至邳徐一帶行鹽之河既於河臣任之則此項銀兩亦係應撥之數非於分外增益也此外別無措處更望軫念徐淮為運道經行之地實為天下襟喉而修河大計原為轉運糧儲戶工二部似屬一體特賜破格議處除山東歲額不多難以協濟外合無於河南河夫銀內每歲量裒六千兩再將

揚州淮安二鈔關并徐州倉分司所抽稅銀每處各  
量留二千兩并前帶徵鹽銀共足三萬之數俱解淮  
庫以濟河工若或再損實難措手伏望敕下該部覆  
議行臣等遵奉施行其該科原題要令濱河要地俱  
各建設料廠每歲秋冬之間即行預積明歲修防之  
具司道置立循環稽考收放總理憲臣歲終奏報夫  
物料既備則臨事無縮手之患稽查既嚴則平時無  
冒破之虞容臣等通行申飭逐一興舉無容別議均

乞聖裁奉旨工部知道該工部覆議揚州淮安徐州  
三分司每年各準支稅銀一千兩河南河夫銀六千  
兩之外又加三千兩每年共支銀九千兩大工餘剩  
銀準留一半其餘覆議相同奉旨這河工善後事宜  
既已議定著凌雲翼督率各官著實修舉以終前功  
餘剩解部銀都著留用却要支費明白毋容苟且冒  
破其餘俱依擬 又覆議河工補益疏題為恭覲河  
工垂成尚有可言懇乞聖慈俯賜亟行以少圖補益

事備仰各司道會同即將條開事宜逐一會議要見  
移建衙舍作何建設守隄官夫作何增添工食錢糧  
動支何項庶免分派小民其宿遷遙隄踏勘地形要  
害斟酌事體緩急如應增築即估計工費錢糧應用  
數目逐一覆加詳議款列具陳謹題請旨 一移建

管河官衙舍以重責成一添設新隄堰夫役以便防

守一添設管隄官部夫以保新工

上三條因今昔  
異宜故不錄一

增築宿遷縣遙隄以順民情先該御史陳世寶題該

工部覆議咨行臣等委官前去宿遷一帶地方逐一踏勘如遙隄接築果於民生漕運兩便不妨酌估具奏擇暇舉行等因行據司道等官踏勘議報前來覆該臣等看得濱河郡邑俱因築有遙隄永除昏墊之患獨宿遷傍湖無隄不免向隅之泣情委可矜但該縣北岸自直河至古城一帶從來不議築隄者正以本處為駱馬待丘諸湖停蓄之所湖外馬陵諸山蟪蛄環抱天然遙隄水無他泄不能奪河而水發之時

河湖相通縈迴展轉水勢稍得舒緩即漢賈讓所謂使秋水得有所休息游波寬緩而不迫也且山東蒙沂諸水俱由此湖入河若一槩接築遙隄則河水無所停蓄而下流難受益多潰決之虞湖水不能外出而淹浸愈廣反增胥溺之患耳今據各司道議於直河官隄頭起至王垆地頭止約二十里舊有民間自築小隄每歲三四月間水發尚小若此隄無恙則麥亦有秋如伏秋水漲至有殘缺合行該縣掌印管河



官每歲冬春間督率本地民夫或量撥徭夫協助修補此於漕河固無損益而於民生亦有裨補矣伏乞聖裁奉旨工部知道本部覆議相同題奉旨是又計議河工未盡事宜疏題為遵奉明旨計議河工未盡事宜事查議得先年淮北一帶惟恃縷隄束水太迫卑薄雜沙每年伏秋泛漲決口不下數十決愈多則水愈散而沙愈停沙愈停則河愈高而決愈甚海口衝刷無力遂致淺狹以故徐呂而下兩岸田廬溢

為巨浸桃清運道僅同一溝運道民生敝壞極矣幸  
賴廟堂堅持獨斷部院協心經理自萬歷六年興工  
以來大小決口悉皆築塞自徐抵清除中間原有高  
阜可恃外餘俱創建遙隄然又慮異常暴漲遙隄或  
亦難容故又於桃清北岸崔鎮徐昇季太三義鎮等  
處建減水壩四座使得宣洩入湖免傷隄址告成之  
後又開復邳州北岸直河一道而蒙沂諸水徑出大  
河開復宿遷南岸小河一道而靈睢積水漸已消滅

近又查得沂河毛墩各涵洞一座應改減水壩見在  
興工若徐州以上茶城口為清黃接會之所自改行  
新河以來地勢中亢泉水力弱每歲運艘過盡之後  
黃河大漲之時或不免數日淺澀先經題準三年兩  
挑至期本司照例請挑無容再議是自徐抵清五百  
餘里之間所以導黃入海為運道民生計者亦可謂  
算無遺策矣以故水力既專奔流迅駛淤沙日滌河  
身日深海口一帶今歲倍加深闊此皆河淮合流衝

刷之明效也所據淮北河工職等再四籌維委的別無未盡若欲勉強搜索恐徒糜費無補惟有遵照部科題奉欽依事例每歲責成掌印管河官將遙隄應幫處所歲加幫築縷隄要害之處隨宜量修所謂久安長治之道似不出此合行會呈具報施行奉旨工

部知道

河防一覽

張養蒙為工科都給事中時都御史潘季馴奏報河工養蒙上言曰二十年來河幾告患矣當其決隨議

塞當其淤隨議濬事竣輒論功夫淤決則委之天災而不任其咎濬塞則歸之人事而共蒙其賞及報成未久懼有後虞急求謝事而繼者復告患矣其故皆由不久任也夫官不久任其弊有三後先異時也人已異見也功罪難執也請倣邊臣例增秩久任斯職守專而可責成功帝深然之

明史  
崇

明神宗萬歷九年五月乙亥戶部題覆鳳揚撫按凌雲翼等奏稱淮安府屬安東縣治濱臨河海嘉靖間河決

草灣口水勢直趨該縣田土湮沒後雖築塞冷沙淤積  
不長五穀前巡撫吳桂芳有廢縣之議今兩河工完草  
灣口漸復淤塞而士民安土重遷俱不願廢况該縣鹽  
盜充斥廢縣必須設兵反滋多事縣治仍舊存留惟一  
應差糧須破格優處乞嚴敕該縣掌印治農等官用心  
撫綏設法招復勿濫準詞狀以生騷擾勿過索供費以  
肆誅求如三年之內民安地墾縣官疏薦擢用不職者  
即行叅處疏入允行 七月壬戌朔總督漕運凌雲翼

言茶城至留城一帶運用咽喉節因黃水倒灌停淤漸高運船率多淺阻已督行司道興工挑浚乞照往年事例暫停進貢船隻支用錢糧俟工完核實具奏章下所

司明神宗  
實錄

明神宗萬歷十年正月壬午戶部覆鳳陽巡撫凌雲翼題淮安府屬東安縣原額六十一里徐州屬蕭縣四十里沛縣三十八里邇因黃河變遷地失人逃議併安東縣為四十里蕭縣三十七里沛縣三十里仍嚴督各

縣官查明見存人戶照軍民匠電原籍歸附里甲當差

填注賦役冊內永為遵守報可

明神宗實錄

是年七月河漲壞民田舍及傷人畜無數

清河縣志

明神宗萬歷十一年正月辛未浚韓家口引渠出徐州

以河防報竣陞碭山縣知縣劉守謙俸一級 二月辛

卯以總督漕運兼管河道太子少保兵部尚書兼左副

都御史凌雲翼為兵部協理京營戎政 四月己亥金

州大雨河溢城盡沒

明神宗實錄



是年徐蕭河溢大水衝沒符離橋

蕭縣志

明神宗萬歷十二年六月己酉漕運總督李世達言河工告成敷陳善後事宜下工部 九月戊寅漕運總督

李世達題黃河日進乞修砌郡城石隄以圖永賴章下

工部

明神宗實錄

明神宗萬歷十三年五月丙戌巡撫鳳陽兼河道右侍郎王延瞻奏鳳淮揚三府徐泗等八州縣頻年災沴河役煩興請自今年始備用馬價俱照萬歷九年事例派

徵 閏九月戊戌起兵部右侍郎楊浚民為戶部右侍

郎總督漕河軍務巡撫鳳陽

明神宗實錄

是年河決范家口時淮城幾為魚鼈亟議修築

淮安府志

明神宗萬歷十四年十一月辛亥巡撫寧夏都御史梁

問孟題近因橫城堡修築邊牆石砌馬頭兼之河西地

軍西徙衝決則寧夏之境不免黃河之患矣欲於西岔

河一帶築隄障水俾漸東流工部議覆從之

明神宗實錄

是年五月河決范家口水灌淮城全河幾奪又決天

妃壩福興漸淤上厓宵旰遣科臣常居敬督塞之績

又加築范口石隄全河復故

南河全考

是年五月十九日郡城東范家口衝決禾稼莊舍盡

淮安府志

范家口離城十五里與劉伶臺毘連東北灣北澗及柳浦灣西近溝頭菊花莊南近

石塘萬歷間為黃河險汎今為民田矣

明神宗萬歷十五年正月戊戌刑科給事中李國士上

言先年河決桃源崔鎮口等與高家堰黃浦淺諸處徐邳間俱成巨浸賴舊總河臣潘李馴創建遙隄修閘壩

築堰口導汜濫東歸雲梯關入海五六年來無水患頃  
秋水靈潦橫流河決范家口凡百餘丈諸臣用力葺塞  
稍得緩流可用決排之力若春漲波濤洶湧新塞之口  
必決值糧運未過之日深為可憂非嚴飭該衙門官員  
乘時修治不可上曰河渠歲修先年漕臣題有舊例著  
該衙門嚴督所屬用心毋得怠弛 二月乙亥總督漕  
運巡撫楊一魁奏淮安自新河永清閘越城歷高堰達  
清口溯清江出草灣繇赤晏廟以至安東復繇高嶺馬

家湖蒯家窪張家窪柳浦灣范家口海神廟禮字壩遺  
惠莊臨淮莊以至西橋往回四百餘里河勢有曲折地  
形有高下隄防有緩急數年以來隄潰於衝激地易於  
陵谷昏墊之後下民其魚待決一口方修一口不惟錢  
糧糜費無紀而運道所關皇陵所護民生所係匪細務  
也今議清河上黃河獨行隄制無虞清河下黃淮合流  
水漲隄微計今查前項工程雖用至七萬餘兩而淮揚  
百萬生靈可免胥溺之患其召募人夫擇日興工估該

實用工費銀七萬一千六百九兩零將淮安府庫貯修砌歸仁隄支剩銀料八千兩工部事例銀二萬二千兩盡數動支而施為之功一曰修高家堰以保上流一曰砌范家口以防旁決一曰疏濬草灣以殺河勢一曰修禮字壩以保新城一曰買辦料物以杜冒破一曰分定委官以便責成有旨隄堰修防事宜依議行先年開濬草灣不久淤塞虛費錢糧應否再加疏濬還著漕運等官詳議停當具奏其餘河道工程俱要查照成規用心

保守毋得疏虞 三月壬辰工科給事中郭顯忠上言  
河工每當伏秋防守水之暴漲也不過旬日其潰決多  
繇隄頂漫流其直射埽灣而決者絕少今石砌范家口  
等隄工或難卒辦不可拘限必先就卑薄要害處盡行  
加幫且清挑而上河道已成使秋漲不決則水流愈急  
水流急則刷河愈深刷河深則海口愈闊盱泗高寶等  
處自可無虞至原設淺夫約二千名趁此畫地分工  
及至伏秋令各管河佐貳帶領原設淺夫使自防守亦

可保無事然沿河疲民困苦尤其施為之時只宜召募游民不可僉派以滋騷擾命下所司 八月癸亥工

科都給事中常居敬等題開封等府陝州靈寶等州縣自七月初十等日霖雨黃河泛漲衝決隄防漂没人畜乞敕河南山東凡有河道地方除管河副使專理外各於巡道照所管地方分主督理捲埽築壩補隙塞決明立賞罰晝夜并工務俾安瀾無貽漕患工部覆奏從之

明神宗  
實錄





行水金鑑卷三十一

欽定四庫全書

行水金鑑卷三十二

江南按察使傅澤洪撰

河水

明神宗萬曆十五年十月辛酉先是黃河暴發將原修鎮河堡西岔河大隄並欄水隄衝決巡撫以聞奪督工官指揮陳勛等俸半年仍條四事曰酌隄防儲柴草專責成寬期限從之 己亥大學士申時行等題國家運

道全賴黃河之從東注下徐邳會淮入海則運道通河  
從北決徐淮之流淺阻則運道塞此咽喉命脈所關最  
為緊要先年河嘗北決張秋決金龍口等處皆命大臣  
往治夫役錢糧動以數十萬計然後成功嘉靖以來河  
之衝決多在徐邳以南自朱衡開南陽新河潘季馴塞  
崔鎮築高堰以後河道安流糧運無阻故近年以來惟  
見下流之通而不虞上流之害河南一帶地方修防疎  
懈隄岸卑薄者間亦有之今年河流散漫自開封封丘

偃師等處及直隸東明長垣地方多有衝決失今一不治明年河水再至勢將北徙上流不下徐淮則運道甚可憂慮此不可不亟為之圖也查得先年設有河道都御史凡河南山東南北直隸河漕經行之處皆屬統轄近來裁革此官分屬各巡撫管理責任既分事權不得歸一今黃河衝決多在河南餘流所及又在直隸若衝安平曹濮又在山東各該巡撫雖已委官相視畫地修築然或彼此不相照應萬一推諉必致悞事臣思河道

未至大壞不必復設都御史但差風力老成給事中一員往河南等處踏看衝決處所稽察各該管河官員就便催督興工各處錢糧會同巡撫官隨宜調發期以初春起工夏間畢事即伏秋水發河流不至北徙徐淮以下自然安流而運道可保無患矣是日傳諭工部朕聞河南等處地方黃河漫流先年舊隄多被衝決即今曾否修築未見奏報著各該撫按官督率管河官員用心經理還選差風力老成給事中一員前去各該地方踏

看併催督工程如有怠玩曠職推諉悞事以致妨害運道者即指名叅奏拏治 丙子工科都給事中常居敬陳河道事宜一開報之當時議令管河司屬各官將河道有無通塞河工有無修舉俱季報部科以便查考一錢糧之當稽議令河道諸臣一切歲終經費年終明開條件具疏奏聞奏冊清冊部科備照庶因錢糧以稽河工而虛冒之弊可免一責成之當嚴議令管河府州縣官查照典制各住分管地方不許別項差委督撫管河

司道時常巡視督率修防遇有漲決一面具報一面興修如廢職怠事即據實叅奏一河臣之當擇議令河道原缺容本部查司屬中才望相應者咨送吏部勿泥資序部覆如議 乙卯敕工科都給事中常居敬查看河道催督工程命禮部鑄給關防 十一月戊子工部覆總督漕運楊一魁題挑濬幫築事宜一草灣口應量挑東岸長二百六十丈西岸長四百丈工料銀共六千一百四十四兩六錢零一崔鎮徐昇黃家嘴三壩止拆石



從下另砌量浚引水支河祖陵東南護隄外用荒石砌  
子隄一道高四尺根闊三尺長與大隄等工料銀三百  
一十七兩零一挑濬淮安府臨城濶河四千二百丈計  
工料銀四千四百四十八兩四錢一幫築范家口隄壩  
除原估銀四千餘兩外續用過工料等銀六千餘兩一  
包砌清河口惠濟祠前裏河隄長五十七丈砌石高一  
十二層本祠後外河長五十四丈五尺砌石高一十三  
層工料等銀共二千五百九十九兩六錢四分一天妃

壩加築平滿排釘椿木内外用石包砌堅固以防衝洗  
各項工料共該銀一萬九千五百九兩零俱於原題濬  
草灣未用銀兩動支其拆開崔鎮等壩并築砌天妃壩  
計費不多俱於河道歲修銀內酌量支用得旨崔鎮壩  
應否該拆候差科臣到彼再議定奪餘依議行 十一  
月辛卯詔河道隄防節年修築不堅以致衝決該管官  
五年內者巡撫奪俸三月道官降俸一級內養病致仕  
者不許推用見論劾者從重議處餘年遠者姑免究

十二月甲申工部覆督理河工給事中常居敬議於大社集南新修月隄之內復取土填實深潭再加修築以聯舊址次將大社集以東至白茅集百餘里隄照舊增修其茅家潭三尖口等處決口與東明縣護城隄併議修築土方工食俱於該府庫貯蒿草及存糧銀內如數動支上從其議

明神宗實錄

是年決祥符劉獸醫口決蘭陽銅瓦廂後決封北原武又決長垣之大社集毛家口茶城亡何又報淤

續文

獻通考

是年冬十月命工科給事中常居敬相度黃河議修治之策時黃河漫流自開封封丘偃師及東明長垣多衝決大學士申時行言失今不治河將北徙上流不下徐淮則運道可憂故有是命已而督河楊一魁議因決濟運導沁入衛居敬言衛輝城卑於河恐一決有衝潰之患沁水多沙善淤入漕未便不如堅築決口開河身加浚衛河民得灌田尤為完計上從之

明紀事  
本末

是年黃河又決荊隆口衝潰長隄入長垣東明二縣  
尋塞之後二年復創築遙隄長二千九十丈以防漲  
漫沁河又決蓮花口金屹嶺水浸獲嘉新鄉一帶

尋塞之亦加築隄壩以防漲漫

南河  
全考

大名府屬長垣東明二縣舊有長隄一道延亘一百  
三十里東至山東曹縣白茅集西至河南封丘縣新  
豐村止隄外即有淘北河一道相傳即黃河故道也

萬歷十五年河由河南封丘縣荊隆口決入挾洶北  
河衝決本隄之大社口兩邑昏墊 沁水至武陟縣  
與黃河會合其湍急之勢較黃河益甚而武陟東岸  
之蓮花池金屹嶇最其衝射要害處也萬歷十五年  
沁從此決新鄉獲嘉一帶俱為魚鼈每年堵築埽壩  
勞費不貲且壩內為商民輳集之處煙爨不下千餘  
倚隄為命今議甃石四百三十五丈隨守隨修限以  
三年告竣此隄一成永久可恃而議者畏難尚未興

舉其北岸大樊村亦係埽灣要害幫隄捲埽均在司

河者留意焉

河防一覽

明神宗萬歷十六年正月癸巳工部覆總督漕運右僉都御史楊一魁條陳十事一改閘座以便防守謂古洪當黃水之衝為入運咽喉閘制上閘下狹閘板難下水入易淤且閘座太低一遇泛漲水從上漫千夫辟易無可奈何欲將前閘乘此改修高下廣狹務俱一律此計之善者也擬允行一嚴啓閉以杜淤墊謂古洪內華二

開建設之初原為伏秋水漲恐致漫淤閉閘堅守不得擅開以嚴其防也但地居衝要官使蝟集勢難阻遏欲比照淮安通濟閘事例每年於六月終旬築壩不許擅開即貢鮮船隻亦酌量盤剝此固為運道完計第官民商賈國課攸關一旦築塞不獨困商且稅額縮矣况貢艘舊屯留京又不可輒議乎擬仍舊一開支河以備緩急謂運舟自茶城入閘乃其故道與河隔遠自河決秦溝改繇濁河口入徐淮乃與茶城緊相對衝又戚家港



湍溜難輓舟多覆沒前道臣舒應龍另開塔山支河頗稱利便而壩閘未建旋復淤阻中河郎中陳瑛始開古洪內華以代塔山五年於茲而復遭淤塞安可不為之計也欲挑浚塔山支河建立壩閘令與內華相等八九月後公私船隻兩道併出固亦有見第閘河水泉不多分而為二不識能常繼否擬會勘一移官夫以資策應謂古洪內華隄夫六百名伏秋水漲修守不足且責閘官以調度弗能也欲將呂梁洪夫分調一半移住古洪

以資修浚管河同知原任邳州者移住境山遇有緊急  
往來督視固屬遠慮第呂梁古洪相去頗遙安土之民  
難以驟徙與職官改駐不同也擬會勘一復故道以定  
長策謂黃河舊出小浮橋水勢順利運道安行累歲變  
遷致梗運道雖建閘啓閉猶時淤塞非本計也欲修復  
故道自歸德以下丁家道口浚至石將軍廟令河仍自  
小浮橋出若撫按各為其民則止浚碭山韓家口河五  
十里誠亦有見第其費有出與否其道可開與否宜行

令撫按勘科酌議以請者也擬會勘一放濁溢以固隄岸謂黃河縷隄修築加高而隄內窪下夏秋間河水外漲雨水內浸其隄易壞欲倣栲栳灣隄勢將徐邳一帶隄內窪處春間開口洩水其與遙隄隔遠者從便築小月隄以防其溢此計之便者也擬允行一引沁水以濟衛河謂黃河挾沁水入衛繇天津下海久矣自河徙而沁與俱南衛水時苦涸竭其流濁也欲倣徐有貞廣濟河之勢引沁入衛不使助河為虐且乘武陟間沁水方

決因便疏浚萬夫一月之力耳固自有見第考先臣黃綰霍韜並有分沁入衛之議似欲藉以殺河患非為衛水益也改作入衛經費既難衝決可慮擬會勘一浚河身以抑泛濫謂善治水者以疏不以障年來每遇水發隄上加隄遂令水高凌空不啻過潁濱河城郭決水可灌可為寒心欲於秋冬之際探測河身深淺隨處挑浚蓋慮患之極思也第黃河之沙從水去來恐難以人力治之且入冬則河南一境堅冰彌望淺深將安測乎擬

會勘一開水門以免橫潰謂黃河發星宿入中國合華  
夷之水千流萬派歸於一壑泛溢其常也况孟津以下  
土疎易衝故先臣丘濬請多開水門以殺上流之勢誠  
為有見今欲於黃河分流故道量設減水石門以洩暴  
漲是一說也第恐黃水洶湧石門之所洩幾何倘涓滴  
不禁致成橫決未獲其利先滋之害矣擬報罷一處河  
費以免偏累謂河上歲修銀三萬兩內仰給於河南者  
九千今本省災傷屢聞拖欠甚多而河工勢不容緩欲

將本年扣省米價銀三萬七千餘兩留備淮上支用其河南解淮銀九千兩免行起解似亦兩便但戶部咨稱米價原係邊餉難以議留宜將本年額內量留九千兩抵河南解數以後仍照例分解不得偏主於其間也擬允行從之 丙申戶科給事中李廷謨奏國家防河如防虜均非可以泄泄制之者今邊臣自督撫而下必閱歷鍊習始為推轂賢者久任加銜自僉憲得至叅政布政甚則節鉞寄之用是人思竭力而收效者宏河臣則

不然按次議差才者不必用用者必才且計日瓜代河之要害緩急既無暇身嘗一得代去即河患孔棘不為累也又何必計久遠哉宜略倣邊臣法凡差管河司官務擇其人期以歲時著有成勞徑轉河道總督員缺得漸次推用則人人思奮而河工有濟矣疏下該部 二月壬戌漕撫揚一魁奏辦御史祝大舟論劾乞敕河臣查勘徐邳遙隄是否如舊縷隄高堰先經衝損者即今曾否修葺錢糧有無乾沒成功是否毀壞一切不敢規

避疏下該部 丁丑工部覆議黃河為患自古已然而  
治河之難中州為甚何也其地沙壅土疏修築既難平  
原多曠一望千里無崇山複嶺之束獨特捲埽以列防  
自為捍蔽故功難就而費亦滋今據科臣常居敬撫臣  
袁貞吉按臣王世揚會勘集議工程地亘千里連於縣  
界兩省而唐家口為黃河要害在考城曹縣之間兩省  
居民互相盜決尤於運道大有關者宜分地專官嚴程  
修築工在祥符滎澤中牟三縣者屬河道僉事余希周



領之在封丘陽武二縣者屬大梁道叅政王來賢領之  
在蘭陽儀封二縣及考城縣芝麻莊陳隆莊唐家口幫  
築隄壩屬兵備副使王之屏領之河內武陟沁河諸衛  
屬河北道叅議徐三畏領之隄壩以丈計者凡三萬三  
千一百五十約費至八萬四千六百餘金事竣一體查  
叙上命依議及時修築依限報完其兩省交界處有盜  
決者設法嚴禁毋得推諉三月癸巳禮科給事中王  
士性請開復黃河故道以圖永利謂自徐而下河身日

高而為隄以束之水行隄上與徐州城等束急流益迅  
委全力於淮而淮不任故昔之黃淮合今黃強而淮益  
縮不復合矣黃強而一啓天妃通濟諸閘則黃搗運河  
如建瓴高寶一梗即江南四百萬石之運坐廢淮縮則  
退而浸泗為祖陵計不得不為石隄護之隄增河益高  
根本之慮不亦可虞也哉河至清河向南衝者凡四折  
而後入海淮安高寶鹽興蓋不啻數百萬生靈之命託  
之一丸泥決則盡成魚鼈將奈之河而紛紛之議有欲

增隄泗州者有欲開顏家河灌口河永濟河南甃高家  
堰北築滾水壩者近議開月河草灣及崔鎮三壩如蟻  
穴漏卮補救迄無寧歲總不如復河故道為一勞永逸  
之圖也河故道繇桃源三義鎮達葉家衝與淮合在清  
河縣北別有濟運一河在縣南蓋支河耳河強奪支河  
直趨縣南而自棄北流之道久且斷河形固在也自桃  
源至瓦子灘凡九十里地下不耕無室廬墳墓之碍雖  
開河經費視諸說稍倍而河道一復為利無窮矣疏下

行河者議 四月甲寅朔直隸巡按御史喬璧星奏河道衝決為患請率舊典復設專官以一事權蓋自古治河止於除害我國家仰給東南歲輸四百萬石自淮至徐實藉河利顧潰決淺澀之患徃徃有之永樂九年分設部司督理或命部院大臣徃視事已輒罷正德四年乃議專設憲臣為總理河南之開封歸德山東之曹濮臨沂北直之大名天津南直之淮揚徐潁咸屬節制建牙如督撫重河防也然理河者不復慮漕而理漕者亦

不復慮河則亦專設河臣之釁矣萬歷五年偶因兩臣  
意見相左遂并河於漕在河南山東北直者以巡撫兼  
領之責分而官無專督故修濬之功怠於無事急於臨  
渴河患日深頃者勘科常居敬亦有專設大臣之議非  
直備官要在得人試按嘉靖以來河漸北徙濟寧以下  
多淤而劉天和之修復魯橋朱衡之開通南陽潘季馴  
之濬刷崔鎮河道賴之此專設得人之明驗疏下部覆  
如議上命督河再設以老成才望者任之 癸亥勘理

河道科臣常居敬會同督臣舒應龍再上河工一十四款一添造閘座以便防守議於古洪閘外加鎮口閘一座外禦濁水內蓄漕河一接築縷隄以防中潰計自茶城以下塔山支河西岸起至河口止長五百丈闊四丈又補築舊河缺口一道長六丈一議修埽壩以防危急王公隄累經衝決與黃河止隔丈許兩河夾之勢最危急議於本隄設法增築實土石於鴈翅之內密釘椿木於捲埽之外并設順水壩以逼黃水之北流一開建月

河以避衝決於運河南岸另開月河以引漕水之南去

則二水相隔頗遙時加培築可保無虞

中四款入運河

一移調

官夫以資策應呂梁徐州二洪水勢既平洪夫稍暇且

屬流寓隨地可安議撥六百三十三名均派新舊五閘

餘者留二洪拽運而管河同知改住境山策應

又一款入運河

一停拆三壩以保成功崔鎮徐昇季太三壩原為洩水

而設議拆者為其高而壩外隄岸更高於壩是存之未

礙宣洩之利拆之反滋汎濫之虞也一停濬草灣以節

財用草灣一河闊二百餘丈先嘗開之以保淮城且淮黃之水藉以分流而開塞靡常無煩濬鑿俱如議行

庚午工科給事中梅國樓薦原任刑部尚書潘季馴堪總河之用時季馴已鐫職為民而科臣謂其向在河上有築濬功會李棟董子行蔡宗周常居敬亦先後薦之故部覆起都察院右都御史總督河道兼理軍務上諭之敕六月己未勘科常居敬奏黃河故道開復甚難宜罷役而訾家營支河之議起癸酉勘科常居敬上



修理河道圖考報聞圖考留覽 閏六月己酉總理河

道都察院右副都御史潘季馴題黃河之水濁而強汶  
泗之流清且弱交會之處則茶城是也每伏秋黃水盛  
發則倒灌入淮沙停而淤勢所必至黃水消落漕水隨  
之沙隨水刷不待濬而自通矣縱有淺阻不過旬日如  
萬歷十年中河郎中陳瑛創建古洪內華二閘每遇黃  
水暴發即下板以遏濁流之橫而閘內無壅阻之害黃  
水消落則啓板以縱泉水之出而閘外有洗滌之功去

伏稍失開閉之防遂至漂壅失常廛惟當宁臣於前月望至宿遷閱視同知徐申謂本月望前黃水偶長丈餘漫入洪口即合嚴下閘板至二十一日報黃水消落於是啓板通漕衝刷成河通行無滯至閏六月等日復然前不過七日後不過三日隨長隨落此即二水勝負通塞之故也勘科常居敬復建口閘一座去河愈近則吐納愈易足為水利但建閘易守閘難運貢之馳行固急勢豪之開放不時數日之羈程不能待而千百年之利

害且決裂矣乞特賜綸音如萬歷八年清江浦三閘之法以嚴啓閉庶河渠永有賴矣部覆如請 十月甲申

工部覆總督河道潘季馴條上河工八事一久任部臣謂水性有順逆河情有分合地勢有險夷如某處迎溜作何捲築以當其衝某處埽灣作何幫護以防其泄事在分司宜委任南中兩河郎中滿三考方與優擢則鍊督久而河防自熟一責成長令謂理河如理家然家務繁瑣不妨分任而庀材鳩工則家督主之今瀕河州縣

長猶家督也調集夫役備辦料物宜專屬之至於巡行督率責之行河者而郡守亦有總理之責焉疎虞並坐一禁調官夫謂治河有補偏救弊之法無一勞永逸之事禹奏平成不數百年而祖乙之都圯則防守弛也故曰防河無止工宜申飭沿河官夫專以河為事不得別差擅調致悞河防一預定工料謂黃河泛漲每在伏秋修築不預往往為河所乘宜於十月中旬即行踏勘分工備物務令正月興作四月報竣後時者罰一立法增

築謂徐淮之間咫尺河流倚遙隄一線為捍蔽而風雨剝蝕車馬蹂躪日就卑薄宜令每歲修隄高厚俱以五寸為限遇低薄處隨宜加築徧植樟柳不如法者聽總河叅治一添設隄官一加幫真土一接築舊隄

以上三條入淮

河命依議行 丙午工部覆總河潘季馴題請罷開復

黃河故道及鑿支渠合沁衛諸議一意修築隄防上報可仍申飭河臣毋因循以致疎虞紛議以妨實事違者聽總河叅究 十一月甲子工部覆河南巡按御史王

世揚奏河南境內黃河自潼關至歸德開封等處奔流二千餘里去總河督臣甚遠利害之切見聞之近必先撫臣宜於撫臣敕書增兼理河道一條與督臣協同行事詔從之 十二月甲申添設河南開封府同知一員駐劄荊隆口祥符縣丞漿澤主簿各一員專管河務

戊子工部尚書石星覆總督河道潘季馴題稱河南黃河上流三門七澤而下地平土疎每易衝決特非運道所經往往忽視以為無虞而不知上源既決運道未有

不阻者故修守之法在河南尤屬緊要其故道繇新集  
出小浮橋銅幫鐵底所當開復而歲儉費繁未能遽行  
惟慎加修守庶保無虞因條列六議一黃河北岸逼漕  
南岸逼省先臣劉大夏於兩岸各築長隄綿亘千有餘  
里百年來頗受其利乃坍塌衝汕歲修易湮宜刻期修  
築一沁水發源沁州至武陟與黃合勢最湍悍而蓮花  
池金屹當其險要也生靈無算寄命一隄危若累卵而  
最險處止四百餘丈即盡甃以石工亦易辦所當亟議

石隄以圖永賴者也一河工甚鉅而所恃工費止河堡夫銀而已近緣併入條鞭有司輒急京運而緩河道任民逋負甚至已徵而別用竟不扣還河工所以墜誤也今議從前借用者如數抵還在民者徵解貯開封待不時之用一役民用其力當卹其私今議開歸懷三郡近隄沒官田地給堡老六畝堡夫五畝不足則以曠工銀置產以授之則民有身家之患防隄益力矣一河之害在河南尤大則治河之功在河南尤難往秋防舉劾僅



行於淮徐而不及河南誠為缺典宜一體甄別以示激  
勸一河南雖非運道所經而河情水性與淮徐無異固  
當以治淮徐之法治之則夫責郡邑長吏以一事權覈  
歲修工程以預興舉增補捲築以固隄防所當通行者  
也詔如議行 癸卯訾家營支河工罷從總河潘李馴  
議也

明神宗實錄 潘  
李馴四任總河也

是年五月十一日敕諭都察院右都御史潘李馴該  
科臣建議先年河道原設有總理大臣近年裁革分

屬各該巡撫官兼管事權不一目今河患不常工程重大要將原官復設簡擇熟知河務任事大臣管理該部議覆相應茲特命爾前去總理河道駐劄濟寧州督率原設管河管洪管泉管閘郎中員外主事及各該三司軍衛有司掌印管河兵備守巡等官將各該地方新舊漕河并淮揚蘇松常鎮浙江等處河道及河南山東等處上源著實用心往來經理遇有淤淺衝決隄岸單薄應該幫築挑淺去處務要先事預

圖免致梗塞并查先年工部題覆事宜一一著實舉行合用人夫照常於河道項下附近有司軍衛衙門調取應用其各省直歲修河工錢糧悉聽通融計處動支所屬大小官員果能盡心河務功蹟昭著者獎薦擢用敢有不服調度怠玩悞事及權豪勢要之家侵占阻截并違例盜決河防應拏問者徑自拏問應叅奏者指名叅奏其餘開載未盡及河道緊要事宜悉聽爾便宜處置其有干漕運撫按衙門事體公同

計處重大者奏請定奪每年終將修理過河道人夫  
錢糧照例備細造冊畫圖貼說奏繳其南直隸淮揚  
潁州徐州山東曹濮臨清沂州河南睢陳北直隸大  
名天津各該地方軍務亦聽爾兼理其各兵備道悉  
聽節制務要防護運道永保無虞如遇盜賊生發即  
便會同各該巡撫嚴督該道官兵上緊緝勦毋致延  
蔓若兵備各官縱寇貽患者叅奏處治爾為重臣受  
茲委託須殫心竭慮輸忠效勞務俾河道安流糧運

無誤斯稱委任如或處置乖方以致誤事責有所歸

爾其欽承之毋忽故諭

河防一覽萬歷五年因河漕兩臣意見相左遂并河於

漕至是以薦仍用公為總督其間沿草之故不可以不知也故特書於此

戊子

萬歷十六年

河大潰天子以言官言拜公田間至是

不特公習河而河亦習公矣既告成錄其功所加築

土隄縷隄月隄格隄長隄橫隄守舊隄寄子隄凡三

十四萬七千八百八十五丈有奇磯閘料廠凡二十

有四座石壩土壩月壩護壩凡五十一道濬淤淺塞

決口鑿老土凡三十萬一千一百丈有奇栽護隄柳  
八十三萬有奇前後十餘年輶車所至更數千里公  
與役夫雜處畚鍤蕭間沐風雨裹霜露髮白面黧  
而後兩河合軌數萬艘轉運無害緣河之民始復見  
室廬丘隴煙火彌望焉公之言曰通漕於河則治河  
即以治漕會河於淮則治淮即以治河合河淮而同  
入於海則治河淮即以治海故竟公在事止以築隄  
束水借水攻沙為萬全第一義

王錫爵撰  
潘公墓誌



行水金鑑卷三十二



欽定四庫全書

史部

行水金鑑卷三十六

三至

詳校官監察御史臣王爾烈

刑部郎中臣許兆椿覆勘

總校官知縣臣繆琪

校對官編修臣沈清藻

謄錄監生臣于時和

欽定四庫全書

行水金鑑卷三十三

江南按察使傅澤洪撰

河水

萬歷十六年都給事中常居敬上河工大舉疏云議  
照中州惟河患為最鉅故其治河也為獨詳邇年人  
心玩於積習法制廢於因循致厯聖懷特旨修築即  
今兩河工程臣等不敢不竭心力矣然必料理精詳

庶可垂示永久若非奉有明旨無以警惕人心既經該道會議前來又該臣等覆議相同合照款列具陳謹題請旨 一預積埽料以防未然臣等查得河南

水平岸高而土疏其湍急埽灣之處患常在下雖有高厚之隄卒然坍塌無所措手故防河之患無愈於捲埽而捲埽之料全資於稍草椿麻與土也往年所用椿木棘麻俱分派於出產州縣買運而柳稍穀草俱於臨河地方召商收買已有定議近因沿河各縣

連年苦旱復遭大水百穀無收欲暫將穀草派之別  
府州縣買納解送亦通融之策但道途隔遠不惟脚  
價浩費抑恐反滋騷擾及查往年穀草定價每束連  
耗草二十二斤給銀二分今年穀草缺乏價貴合無  
每束增銀一分共給價銀三分仍舊召商收買此後  
豐年酌量估裁庶草價既增而商販自至矣至於捲  
埽胚胎純用好土始得堅完必須預積平日庶可取  
辦倉卒近因久無水患管河員役不復議積每遇急

迫取土寫遠緩不濟事竟日搬運不成一埽遂至決  
口漸闊為害滋大矣合無令各守隄守壩堡夫於閒  
曠之時查照成法令各管河官督令預運埽土堆垛  
於埽壩及緊要隄岸之上每年會計之時查算某處  
該積土若干責令各夫如數運積著實查驗無容虛  
報其河流衝射之處仍當預置旱埽如伏秋水發微  
有衝刷即時添補管河官一面督行一面申報則有  
備無患而埽不虛費隄防愈有賴矣 一議處工食

以卹窮民臣等查得估計修築隄壩工程每築方廣一丈高五寸為一工每夫一名日完一工方給工食銀三分三釐三毫夫以一人而日築一工已為難完況取土有遠近之不一填築有險夷之不同槩以一例計工既不能依期報完復又計工給銀安得盡滿所望且今歲米價騰貴數倍徃昔一工給銀三分三釐三毫亦不足其食用若一日不完一工則所得工食益不足以糊口無惑乎每遇募夫召之不至也合

無將今歲做工夫役每一工給工食銀四分如取土在百步之內及在平地修築者俱仍以方一丈高五寸為一工若在坑坎水內填築及在百步之外取土者酌量減其寸數俱每工給銀四分如此則工食既加而養贍足工程有等而勞逸均人心亦知樂從矣其已後成熟年分仍照舊查給 一議設堡房以慎守禦臣等查得黃河兩岸長月等隄并埽壩之處先年每二里建堡房一間僉堡老地方各一名統領火

夫十名巡守以防河患原無工食數年以來天時亢旱河患稍息人心懈弛堡房傾倒而予遺災民星散求食各隄防守遂無人矣惟各埽壩處堡房尚存數名然為數亦少不足應用昨歲河患雖出異常之災未必不由疎虞所致也合無於黃河兩岸各新舊長月等隄每二里仍建堡房一間每堡僉鄰近堡夫二名每五堡僉勤能堡老一名統率各堡夫晝夜往來巡守栽培柳樹但有盜決隄防及砍伐隄柳者即便



擒拏送官究治遇有河水泛濫衝刷損傷即行填補  
每堡老一名月給工食銀五錢各役每名月給工食  
銀三錢俱於河道官銀內支給至於臨河埽壩尤係  
要害修守之工倍當加謹仍每二里建大堡房一重  
三間盛放埽料以備急用每堡設堡夫五名每二堡  
設堡老一名管河官不時查點遇有緊急衝刷不拘  
晝夜本堡鳴鑼各堡老督率各夫前來接濟併力堵  
塞其堡老必於鄰近鄉民中選精勤守法者充役如

此庶防守俱各得人而河患可保無虞矣 一議處  
廠夫以杜偏累臣等查得臨河祥符等縣設有官廠  
八處收貯稍草椿麻以備捲埽每廠原有廠夫二名  
或三名令其看守物料先年俱於各州縣堡夫內選  
殷實大戶充之凡管廠官合用心紅紙劄并僱覓書  
手造寫循環倒換盤纏及僱人晒晾物料并修理廠  
房牆垣冗費百出每名每年費銀五六十兩如遇不  
才官員需索常例費至百金者有之後因稱累以堡

夫二名朋應廠夫一名每年工食銀四十八兩至萬歷十三年該前任巡撫臧惟一允河道議每名裁定工食銀三十六兩以其數非不多也不知工食有限而額外之費無窮夫廠夫原以看廠為名惟晒晾物料是其職守乃至責以不貲之費磨累無休身家蕩敗無惑乎合口稱苦不敢承役也相應痛革以後每廠夫一名以二人當之給條鞭工食銀二十四兩扣除銀十二兩存貯官庫不許復僉正頭惟召募鄰近

土民充當一切雜費如管河官心紅紙劄等項量於  
編派其登報文冊修理牆垣即於前扣銀內申請動  
支不許濫派廠夫出辦惟稍草等料有浥爛數多各  
役失於苫蓋晒晾者姑免問罪令其量賠如此庶需  
索之弊既革而廠夫之害可免矣 一及時給散以  
杜侵剋臣等查得河工全賴人夫夫役全資工食河  
道錢糧俱貯府庫管河官不得自由必至河岸衝決  
方議調人夫請支錢糧已無及矣合無每遇春時該

道行管河同知通判等官赴府領銀分發沿河州縣  
專聽不時之需遇有河患一面募夫一面申請事完  
稽查庶不耽誤至於給散工食往時獨責之各縣管  
河佐貳官各官多不親理又委之部夫陰醫等官稱  
鑿給散其中不免扣剋以致各夫鮮受實惠合無以  
後給散河夫工食俱聽該府管河官督同各縣掌印  
官眼同包封唱名給散再不許令各縣部夫官總領  
致滋奸弊如府管河官偶在別縣督工一時不暇者

聽各縣掌印管河官徑自散給如此庶扣減之弊既除而夫役之逃可免矣 一責成正官以便查覈臣等竊惟設官定制在府州縣雖有清軍管糧捕盜理刑管河等官分任佐理而兼總條貫則掌印官事非謂各官之外掌印官全無相干也故一州縣之中河渠要害孰非正官之所當料理防守者况中州生靈命脈係於黃河可以正官而漫不關心乎乃向來河務該道止行文府管河官府管河官止行文州縣管

河官而該府州縣全不經由故問河水衝決非不曰某州某縣之某口決也問應用人夫應動錢糧所以治其決者則曰有管河官在非本州本縣事也不知河患係民瘼最切不此之究而徒委之於一二佐貳彼其威令不行召集人夫既多阻撓操持不定動用錢糧又難清楚况修理工程必動錢糧管河官身任其事則錢糧自有粘帶每年會計既令其查議矣乃年終覈實亦令其自為而自覈之無論工程虛薄錢

糧冒破無由而覺即工程堅固錢糧明白誰則信之  
是尤不可解也合無自後申飭各府州縣掌印官凡  
遇河務雖有管河官專管至於催攢人夫給發錢糧  
各掌印官務破積習協心共濟其會計工程亦與管  
河官會同估議每年河防畢日該道將各掌印管河  
官分別勤惰開呈兩院量行獎戒如此則精神流貫  
而法亦昭明責任各專而功可永賴矣 一議豁隄  
糧以蘇民困臣等看得黃河兩岸皆係民間納糧田



地而新舊所築長月縷水減水等隄壩南北兩岸上  
下綿亘六七百里其根闊有七八丈者有十餘丈者  
所壓占民地不下千百餘頃自來地內夏秋稅糧并  
各項差銀尚係地主賠納臣等竊謂築隄乃為一縣  
小民捍患非一人一家私事其占用各戶之地既不  
償以原價復令包納虛糧誠於人情有所不堪合無  
候部議行臣等轉行臨河各縣逐查各該地方除年  
遠舊隄外其有五年以內新創及幫築隄壩若干道

某道根闊若干長若干共計壓占民田若干每年共計稅糧差銀若干即與除豁均派槩縣地內徵收抵數及查見今種麥挑挖者量給倉穀以補子種之廢庶包賠之糧不致偏累而沿河之民可免向隅矣奉旨依議著實行 又酌議河道善後事宜疏云治河者既欲祛其害復欲資其利誠難之難者矣考之國家之功令諸臣之經略犁然具備若可持循然而時勢稍殊則法制不可不講人心易怠則申飭不可不

嚴桑土之謀當於未雨況河道多艱補偏救弊之方  
其容以或已乎臣疎庸無似誤蒙皇上任使日夕兢  
兢罔知報稱日來奔走河漕酌之事機詢之輿論稍  
得其槩除各項工程會同撫按諸臣另疏具題外敬  
抒一得列為八事用備採擇少效涓埃謹題請旨

一復河臣以一事權竊惟今所稱漕河者南盡瓜儀  
北通燕薊天下所由飛芻輓粟而通塞之機所關於  
國計甚重也第河道源流既遠名稱亦殊分合異形

決塞靡定即使精神專而料理密尚恐不足以濟事也先年設尚書侍郎或都御史一員總理河道以故事體畫一興作甚便議定而行無敢格者諸臣經略之蹟至今班班可考乃邇年罷不設歸諸總督漕運而各省則令巡撫兼之不思河道變遷常在指顧呼吸之間非專一則牽制而難行非身親則怠緩而誤事稍顧忌則齟齬而敗績或猶豫則後時而罔功此其所係何如者至於各巡撫專制一方辦官邪審刑

名稽錢穀理鹽盜日不暇給乃欲出其什一辦河務其將能乎非獨此也河南之令不能行於山東山東之令不能行於淮揚即一舉而可以垂永利此最忠國便計而各省牽連甲可乙否卒亦憤惋而止至於氣脈不貫事體牴牾此其害未可一二言也嗟夫禹平水土稷教稼穡未聞兼理奈何令并漕運河道而無之也即今督臣初任經理方新才品卓然足以勝此但以河道事理論之仍當專設總督重臣庶權不

分而事易集矣 一嚴啓閉以杜淤淺一催糧運以

謹河防

上二款實錄載其部議略見運河

一定賢否以便責成照得

東南之所急者無大於河漕而所以重河防而責成效者無過於賢否今時河道督臣總理於上部司分理於下乃各府佐官則專率州縣管河判官主簿聽候部司分委辦料興工且吏部給與文憑填注專管河道不許營求別委法甚善也乃賢否則各衙門主之而部司不與焉夫河道艱虞脫有緩急若救火追

亡猶恐弗及乃部司曾不得操賞功酬勞之權是求  
前於却欲責其功力難矣以故別衙門執賢否以便  
差委而各官亦或冀差委以圖親信反視河道若駢  
拇枝指然及潰決而圖之已無及也合無查照清江  
造船廠官事例凡係管河官專屬河道部司年終考  
覈分別賢否徑呈督撫咨部施行不許別謀差委及  
查濱河處所俱有各官公署仍量行修理常川駐劄  
毋使混居府城以妨職業庶賢否定而人心趨責成

專而分理便矣 一議近轉以勵人心語云耕當問  
奴織當問婢語專一也夫耕織細事猶不可泛任况  
河道重務苟非得其人專其任徒使素不經事者嘗  
使而漫為之猶未能操刀而使割也驟而語地利孰  
知險夷驟而語版築孰辨工苦及舉事不當始議更  
置錢糧實已耗費亦無及矣故任河務者非得忠勤  
任事之人久任而責成之不可也第州縣佐貳官卑  
祿薄欲使之數年不調其志易隳故欲勵人心莫若



近轉如巡司之守隄堰也州縣佐貳之司歲修也通  
候部道年終覈實分別類呈督撫咨部紀錄倘主簿  
缺則推大使判官缺則推主簿縣令缺則推判官否  
則加銜以俟遇缺推補其同知通判等官亦照此行  
但宜慎重考覈果有顯蹟方得推舉則雖陞遷不出  
淮揚四府異日舉大役興大工令此素習者為之輕  
車熟路蔑不濟矣矧其人尚留地方即不稱吾得而  
議處之夫既叨顯庸而又知苟且之無所逃罪也有

不視河事如家事者乎 一議錢糧以濟河工一稽  
工料以資實用 一重修守以謹河防天下之事作  
之者固不易而守之者尤難况於河道關漕運重計  
乎何也水勢之緩急夫役之調度錢糧之盈縮工料  
之磨算是無一事可忽也正月辦料二月興工三月  
終工未就而桃花水發五六月而伏水發七八月而  
秋水發是無一時可忽也若遙縷各隄若歸仁集若  
高家堰若王公隄若西橋范口等處是無一地可忽

也此其責甚重而其勞為獨至然實不外於歲修之中但在人見其無奇功在已見其守舊轍於是苟安者多玩愒好事者喜紛更其於河漕何所裨益不知治河如治邊防水如防敵今各邊之臣謹斥堠修城堡練士卒飭器械豈必騁遠略計首功而後可以言勞哉然而秋防有叙歲終有薦聞邊有錄以故人心有所激勵而興起今河臣出入風濤奔走拮据勞瘁之狀不減邊臣乃歲修之功末由自見非情也臣以

為有怠事之罰亦當有勤事之賞合無除興舉大工  
外每年歲終總河大臣將部司以下各官查其修守  
勤惰分別注考移咨吏工二部紀錄案候三年該部  
類題請旨賞罰以昭勸懲果有成勞雖破格超遷或  
加服俸亦不為過如或持祿養高偷安廢事致妨河  
務者即行議處如是則人知職業修而事功自見防  
守嚴而河道永賴矣工部摘將嚴啓閉等五款覆議  
相同題奉旨依議行又該吏部摘將定賢否議近轉

二款覆議相同題奉旨近年管河佐貳等官多有營求差委妨廢職務不行用心防守的總理衙門務遵敕諭拏問重治不許姑息其餘依擬行又該吏工二部會議復河臣一款題奉旨這總理河道官準復設著推練達老成有才望的去漕運河道衙門各職掌還查擬停當來說

河防一覽

明神宗萬歷十七年六月癸巳總理河道潘季馴言黃水暴漲洶湧異常衝開獸醫口月隄者一漫出李景高

口新隄者一衝入夏鎮內河沒壞田廬溺死居民者一  
其餘或水與隄平或隄不沒者尺許勢且不測科臣張  
養蒙等因言前此工程培之未高築之未堅以召此患  
部議咨行河道督率各官築塞增修要使束水歸漕又  
以河臣駐劄濟寧去河南千餘里該省撫臣咫尺黃河  
本院先經題覆凡倉卒有患則撫臣一面相機築浚一  
面馳報河臣議處得旨隄完未久遽有衝決顯是修築  
不堅經營官各奪俸三月 乙未工科都給事中張養

蒙又上疏曰近覩總理河道潘季馴報成叙功兩疏諸臣勞績瞭然在目極稱工程堅固足保無虞陛下且不吝爵賞以酬之矣蓋成功非難保功為難於決委之天災挑塞歸之人力報成未幾俱有後虞求脫紛紛此其故皆繇於河臣不久任也官不久任不便有三後先異見也人已異謀也功罪難執也功名之心孰不有之前者以功陞賞矣代其任者守畫一而襲故常則疑於無所事事於是不曰某故道當開則曰某新壩當改不曰

某堰工可廢則曰某湖地可耕倖邀異績欲求多前人  
此後先之易見也人情易分爾我功出於我則修守常  
勤功出於人則修守常懈勤則修築可保無虞懈則隄  
渠必至漸壞此人已之異謀也功罪可執而後賞罰不  
淆假令一隄之築也倏堅倏潰一渠之濬也倏通倏壅  
前者蔽罪於後工之不繼後者推罪於前工之本虛罪  
前已非見任之官幸免追論罪後又以新任之故得從  
亮原此雖賞罰之不明亦繇功罪之難執也查萬歷五



年有管河司道等官都著久任不許陞轉之旨世宗末年有查分管官員職名籍記在簿日後有不堅固即便指名叅治之旨今右都御史潘李馴三任河漕熟諳水道陛下起用之意固欲責其新功自宜久任以重河務其司道各官併令一體久任蓋治河如治虜邊方總督有十年一鎮者矣兵備有僉事加至布政司者矣河道之臣胡為不行久任哉再惟人臣報君職掌有在豈足言功今茲之敘完有成議矣以後年年修築疏防皆河

臣職守所當自盡更不必瑣瑣敘錄致啓幸途從之

十月癸卯黃河決口塞河工告竣工部敘治河各官潘

季馴等賞賚有差

明神宗實錄

是年河決雙溝單家口於是專議築趙皮寨至李景高口遙隄築將軍廟至塔山長隄築羊山至土山橫

隄河防幸無事

明紀事本末

是年河由李景高口決衝月隄入睢陳故道尋塞之其明年自趙皮寨起至本口加築遙隄長二千三百

二十九丈以防浸溢

南河全考

是年以清水河月隄隸豐縣每被浸汕又添築月限長二千五百丈以邵家壩遏斷秦溝舊路最為喫緊

又接築數百丈復幫築高厚

山東通志

是年草灣河大通先是草灣河通塞不常至是大通奪正河十分之七至赤晏廟仍歸大河清江浦外居民恃以為安而河高較之正河僅三分之一上流未免稍稍逗遛耳 又築塔山隄長九百餘丈

淮安府志

是年六月黃水大發合睢水注縣城平地丈餘

睢寧縣志

是年春夏霖雨六旬秋復大水河溢知縣康煒申疏

巡撫唐應龍奏蠲發賑衆賴以安

蕭縣志

明神宗萬曆十八年十月癸巳總理河道右都御史潘

季馴引年乞休不允十二月壬申原任工部尚書朱

衡治河有功土人立祠至是都御史潘季馴請加修葺

改為敕建祠宇從之

明神宗實錄

是年又築塔山隄長七百餘丈

新築單口辛安壩又

溝馬家淺洋山峰山諸格隄縷隄既不可恃萬一決縷而入橫流遇格而止可免泛濫水退本格之水仍復歸漕淤溜地高最為便益永無分流奪河之患

淮安

府志

明神宗萬歷十九年二月己巳總理河道都御史潘季馴再疏乞休兩經票擬俱不批發大學士申時行等以漕運將行河防甚急本官既已告病恐因循誤事為患匪輕具題請旨 壬辰河道都御史潘季馴因病乞休

吏部題覆催請三次工部催請一次大學士申時行等  
先曾揭請俱不報時行等恐誤河防或妨運道復具疏  
題請 三月庚申總理河道潘季馴題稱河防喫緊伏  
秋為嚴而臣三疏乞休病已阡危須著司道官畫地巡  
行如有疎虞照地叅究從之仍著在任調治用心經理  
督察 四月辛酉工部覆禮科給事中胡汝寧言徐州  
河患乘冰消之時宜修培依議行 五月癸酉總督河  
道都御史潘季馴議開魁山支河條議四事一甃石隄

以固保障一設長夫以備修守一改隄夫以專疏浚一  
信法令以防淤阻部覆俱依議行 六月丙申總督河  
道都御史潘季馴言去冬十月間聞徐城積水未消議  
者要改河就城時已牌行徐州道將魁山支渠查勘開  
洩而改河之說牢而不破迨題明速開後新渠告成積  
水消盡衆議頓息僉謂改河遷城俱可免議矣今接邸  
報廣西巡按御史錢一本題及徐城積水一事以城內  
之水疑及外河要疏浚徐呂二洪下流謂臣世世欺罔

當錢一本過徐之時正雨雪之候城中積水委多此時  
行濬魁山之渠已逾兩月內水委與外河無干徐州所  
報十二月消水印揭見存何敢泄泄欺罔至於挑浚二  
洪下流須塞而後開今二洪之水河深流迅縱欲疏浚  
從何下手乎上曰徐州積水已消該部勘議已定已有  
旨了 十一月癸亥工部題覆河道都御史潘季馴條  
議一放水淤平內地以圖堅久謂縷遙二隄俱為防河  
善法但宿遷以南有遙無縷獨直河以西地勢卑窪歲



歲患水宜將遙隄查閱堅固却將縷隄相度地勢開缺放水沙隨水入地隨沙高庶消患而費可省一接築遙隄以防奪河謂黃河之勢分則河遂奪緩則沙遂停宜自永賴亭以下接築遙隄計五百四十丈至黃家溝止庶河無分流而事可永賴一增支渠大隄以杜淤淺謂徐城積潦悉繇新開支河洩出惟魁山迤北王家林一段約長十餘丈迤南倪家林一段約長三十餘丈宜倣支河新隄之法築大隄一道自無塌損之患積水勢若

建瓴矣

後二條分入淮運二河

合依所議備行淮揚撫按官查勘

另行題請著依議行

甲戌以河湖並漲修守事竣將

知府陳廉等及州縣官五十三員優獎知府張問禮等

及縣官四十七員量獎主簿賈應元王階提問縣丞鄧

鴻等六員各行戒飭 十二月壬辰總理河道右都御

史潘季馴以先年給繇加太子太保工部尚書兼都察

院左都御史照舊管事 辛亥工部尚書曹同亨等奏

今秋河決山陽隄田衝潰及江都邵伯等處湖水下注

州縣浸傷皆繇管河各官怠悞修守科臣朱維藩欲特設巡河御史一員督理宜即敕管河各官務要著實修守有怠悞者會總河衙門叅究不必另設憲臣以滋勞

費從之

明神宗實錄

行水金鑑卷三十三